

Program Stad Senterparti 2019-2023



Vedtatt Nordfjord Hotel

06.05.2019

Kva samfunn ynskjer vi?

Senterpartiet vil byggje samfunnet nedanfrå. Vi vil ha eit samfunn med frie, sjølvstendige menneske som med tru på egne evner tek ansvar for sitt eige liv, for fellesskapet og for natur og miljø. Forvaltertankegangen er eit prinsipp i Senterpartiet. Det betyr at hav, jord, elv, luft og land skal overleverast til neste generasjon i minst like god, eller betre tilstand.

Vårt menneskesyn har utspring i det kristne verdigrunnlaget og humanistiske verdiar i pakt med dette. Kvart menneske er unikt og uerstatteleg, og respekten for menneskeverdet er overordna andre verdiar.

Kvifor Senterpartiet

Senterpartiet seier at ein vil «ta heile landet i bruk» og at ein vil ha tenester der folk bur. Dette står Senterpartiet for enten du snakkar med sambygdingen din på kommunevallista, eller om du snakkar med våre politikarar på Stortinget. Vi meiner at alle skal ha godt tilbod og likeverdige tenester nær der dei bur.

Stad kommune skal vere ein god plass å vekse opp med gode skular og levande lokalsamfunn frå ytst til inst. Vi meiner Stad kommune skal ha ambisjon om at Nordfjordeid er det største vekstsenteret i Nordfjord.

Vår prioritering vil alltid vere å ha nok hovud og hender ute hos dei eldre, skuleelevar og hos barnehageungane. I ein langstrakt kommune er vårt langsiktige mål å bygge kommunen betre saman med vegar.

Viktige prinsipp for Stad Senterparti er at vi vil:

- sjå *heile* den nye kommunen.
- sjå og hjelpe dei svakaste.
- skape eit godt samarbeidsklima og vere konstruktive.
- skape identitet og stoltheit blant innbyggjarane.
- skape ein kultur for å heie fram dei som tør å satse.
- samarbeide med naboane og alltid strekke ut ei hand, saman er vi sterkare.
- tenke globalt handle lokalt.

«Det er viktig å skape eit godt tilbod for alle, same kor ein bur i kommunen, og sjølv om vi ynskjer fortetting og utvikling i sentrum, skal det også leggest til rette for busetnad og utvikling i grendene»

Ein god oppvekst

Vi vil at dei som veks opp i Stad kommune skal ha ein trygg og lukkeleg oppvekst. Dei skal vere trygge på seg sjølv og sin identitet. Dei skal vere stolte av plassen dei kjem frå og kjent med moglegheitene som finnast her for dei i framtida.

Psykiske plagar er ei av våre største samfunnsutfordringar. Verdens helseorganisasjon anslår at nettopp det vil bli den største årsaka til sjukdomsbelastning framover. Vi må få ned terskelen for å snakke om, og få hjelp med, psykiske plagar. MOT-arbeidet er såleis viktig som eit livsmeistringsprogram i ungdomsskulen. MOT til å vere seg sjølv, ta vare på seg sjølv, ta eigne val og inkludere alle. MOT sine hovudverdiar er mot til å leve, mot til å seie nei og mot til å bry seg.

For at Stad kommune skal vere ein attraktiv stad å busette seg er det viktig med barnehagedekning i ulike deler av kommunen. Slik kan nyetablerte tilflyttarar få knyte nettverk til nærmiljøet sitt, samstundes som barna får følgje av venene sine i overgangen til barneskule.

Kommunen må prioritere å ha nok ressursar til alle elevane. Velfungerande leiing og vidare satsing på lærarane er viktig for å sikre gode skular. Senterpartiet meiner at eit godt skuletilbod i Stad kommune også betyr at vi skal oppretthalde dagens skulestruktur. I dag ser vi at Nordfjordeid Skule sin kapasitet er under press. Det er difor behov for å vurdere framtidige behov og endringar på bygningsmasse. Senterpartiet meiner at vi også må sjå på andre gode løysingar i mellomtida. I dag vert flyktingar busette i Nordfjordeid sentrum. Det blir ikkje følgt opp med tilstrekkeleg ressursar på Nordfjordeid barneskule til å følgje opp dette. Dette kan gå utover både desse ungane, og dei andre elevane. Senterpartiet meiner det ville vere gunstig for skulane og for integreringa om familiar som kjem i framtida vert busette rundt om kring i andre bygder i Stad kommune også.

Vidaregåande skule er ein viktig del av oppveksten og i praksis ein del av grunnutdanninga. Difor må det vere mogleg å ta vidaregåande skule frå der du bur. Vi vil arbeide for at ungdom som ynskjer det skal få bu heime lenger. Mellom anna ved å ha skuleruter tilrettelagt for elevar i vidaregåande skule. For Senterpartiet er det viktig å bevare nærskuleprinsippet for å sikre høg gjennomføringsgrad. Desentralisert skulestruktur er avgjerande for ungdomen vår og for å sikre berekraftige lokalsamfunn.

Barnehage

- Sikre full barnehagedekning, med to inntak årleg.
- Syte for at barnehagane har gode uteområde, og nærliggande turmoglegheiter.
- *Ha aktivitetsbaserte barnehagar der leik og meistring er hovudfokus.*
- Ha aktiv deltaking i matlaging for born i barnehagen for å skape gode haldningar seinare i livet. Lære om matvarene frå jord til bord.

Grunnskule

- Vi vil oppretthalde og vidareutvikle dagens skuletilbod, med dei skulane som er.
- Senterpartiet vil arbeide for å ruste skulane for framtida.
- Gjere raske og enkle utbetringar på uteområde, og vurdere langsiktige behov for endringar på bygningsmasse på Nordfjordeid skule.
- Prioritere tilstrekkelege ressursar for å sikre godt læringsmiljø i klassene.

- Ha aktiv deltaking i matlaging i barneskulen og lære om kosthald og matvanar. Lære om matvarene frå jord til tallerken. Gjerne i kombinasjon med dagleg felleslunsj på barneskulane.
- Vi vil undersøke moglegheitene for å innføre varm mat på skulane.
- Innføre dagleg fysisk aktivitet i skulane og auka fokus på symjeopplæring.
- Aktivt ta vare på og formidle kulturarven vår.
- Vi vil legge til rette for at born og unge får oppleve kva Nordfjord har å tilby gjennom undervisning, aktivitetstilbod og samarbeid med næringslivet.

Vidaregåande skule

- Vi vil arbeide for tilrettelagt skulerute slik at VGS-elevar kan bu heime lenger.
- Vi vil arbeide for gode tilbod på desentralisert skulestruktur.
- Stad senterparti vil ha eit tett samarbeid mellom Stad kommune, skulevesenet og arbeidslivet i kommunen, for å auke interessa for å ta yrkesfagutdanning.
- Aktivitetsdagar for ungdom der dei kan bli kjent med ulike yrkesfag.
- Samarbeide med næringslivet for å ha nok lærlingplassar til elevar på yrkesfag.

Høgare utdanning

- Mange ungdommar flyttar vekk for å ta høgare utdanning. Stad senterparti ynskjer at Stad kommune og næringslivet saman må jobbe for at ungdom med høgare utdanning kan komme heim med sin kompetanse.
- Stad kommune og næringslivet må jobbe for desentralisert høgskuletilbod.
- Arbeide for innsatsen til Framtidsfylket held fram i Vestland fylkeskommune og at Stad kommune og næringslivet aktivt tek del i dette.

Trygg skuleveg

- Alle elevar skal ha trygg og god skuleveg, både dei som går og dei som tek buss.
- Oppdatere, prioritere og gjennomføre trafikktryggingsplan.
- Arbeide for rassikring av utsette strekningar.

Idrett og kultur

- Vi vil arbeide og legge til rette for at alle skal ha tilgang på gode aktivitetstilbod innanfor både idrett og kultur.
- Arbeide for at ungdom skal få gode og trygge samlingsplassar.
- Kulturskulen er ein bærebjelke for kulturlivet, og må vidareutviklast i Stad kommune.
- Støtte opp under mangfaldet av frivillige lag og organisasjonar i kommunen.
- Vi vil jobbe for vidare reduksjon av leigesatsar på idrett og kulturskule.

Helse og omsorg

- Arbeide for at alle skal få ein god start på livet ved å halde på eksisterande sjukehusstilbod og sjå på moglegheitene vidare.
- Sikre at alle får det helsetilbodet ein har behov for.
- Saman med ungdommen lage samarbeidsplattformer mellom ungdom, helseaktørar, skulevesenet med fokus på ungdom og helse.
- Vidareføre MOT-arbeidet som livsmeistringsprogram i ungdomsskulen.
- Gje alle elevar i alderen 12-19 år ei årleg samtale med helsesjukepleiar eller nokon med tilsvarande kompetanse.

- Ha kontor til helsesøster på skulane der ungdom lett kan ta kontakt om dei treng det.
- Arbeide for ambulerande tannlege slik at skuleborna i ytre del av kommunen kan gjennomføre kontrollar og behandlingar på tannklinikken i Selje.

Arbeidsliv

- Sikre at ungdom er kjent med næringslivet og moglegheitene som finns i Stad for både arbeid og utvikling.
- Arbeide for å utvikle fleire varige tilrettelagde arbeidsplassar i kommunen.
- Ha eit samarbeid med næringslivet, slik at dei kan tilby skuleleie ungdom praksisplassar.

Ein god plass å bu i verda

Stad kommune vil strekkje seg frå inst i Hornindalsvatnet til ytst i Ervik. Det blir ein langstrakt kommune med variert natur som byr på alt frå nakne klipper som står mot storhavet, til rolege fjordarmar og dalar. Ein kan stå på snøbrett på Harpefossen og på surfebrett i Hoddevika. Moglegheitene knytt til opplevingar i naturen er nesten utan grenser. I tillegg er kommunen rik på organisasjons- og kulturliv i alle krinsar. Operahuset byr på eit så allsidig og tett program at det gjev ein urban følelse av å bu ein stad der det skjer mykje meir enn du kan få med deg. Opera Nordfjord og Malakoff syner at alt er mogleg. Dugnadsåndar står sterkt i kommunen og er ein av våre største verdiar som vi må ta vare på i framtida.

Selje kommune er ein av få kommunar som ikkje har investert i fleirbrukshall. Eid Kommune har to hallar i tillegg til kulturhus. Senterpartiet meiner vi må jobbe for eit likeverdig tilbod i Selje som dekkjer dei langsiktige behova for skulen, idretten og kulturlivet.

Vi må legge til rette for at det er lett å busette seg i heile kommunen. Bryggja er eit eksempel med gamal arealplan og utan ei einaste ledig tomt. Det må sikrast tilgang på kommunale tomter i alle krinsar.

Vi ynskjer å få gjeninnført tannlege for skuleborn på klinikken i Selje. Som eit minimum bør det vere mogleg å få gjennomført kontrollar, og helst behandlingar ved at tannlegen samlar opp til behandlingdagar. Dette vil spare foreldra for unødig køyring, og at dei må ha fri frå jobb.

Eit godt oppbygd kommunalt helsetilbod og sikre alle innbyggjarane det helsetilbodet dei har behov for, er ein av dei viktigaste kommunale oppgåvene. Stad senterparti vil jobbe for at når du treng hjelp frå helsevesenet, så skal hjelpa vere der. Og så langt det lar seg gjere, vere nærast mogleg der du bur.

Vi vil:

- At det skal vere godt å bu i alle delar av kommunen.
- Arbeide for at det skal vere tilgang på kommunale tomter i alle krinsar.
- Kommunen må utarbeide gode bustadplanar for kvar krins.
- Arbeide for at det skal byggjast utleigebustadar slik at ungdom enklare kan komme seg inn på bustadmarknaden, og terskel for tilflytting vert lågare.
- Vi vil samarbeide med Harpefossen skisenter for å vidareutvikle anlegg og tilbod. Dette for å sikre vidareføring av posisjonen som regionalt alpinanlegg.
- Jobbe aktivt for betre utnytting av nærmiljø og naturen i kommunen i høve turstiar, samlingsplassar og naturleikeplassar.

- Jobbe for å realisere fleirbrukshall/kulturhus i Selje.
- Senterpartiet ynskjer å leggje til rette for realisering av fotballhall og tribuneanlegg med miniatyrskytelane i området kring skulane på Nordfjordeid
- Arbeide for tilstrekkelege rammer til kommunen sine oppgåver. Eigedomsskatt skal vere så lav som mogleg, men Senterpartiet vil nytte eigedomsskatt for å sikre innbyggjarane det tenestetilbodet dei ynskjer.
- Sikre at samanslåing av Selje og Eid kommune ikkje skapar meir byråkrati. Mest mogleg av ressursane er ute hos barnehageborn, skuleelevar, eldre, og i felt for å ta vare på våre vegar og bygg.
- Bevare og styrke Nordfjordeid lokalsjukehus og ha tilstrekkeleg med plassar i kommunen til å ta imot ferdigbehandla pasientar kommunen har ansvar for.
- Ha eit tett og godt samarbeid med helseaktørar i kommunen, skulevesenet og frivillige lag og organisasjonar for å oppnå eit program for folkehelse som gjer Stad kommune leiande i landet innan folkehelsearbeid.
- Skape møteplassar og aktivitetsplassar for alle aldersgrupper med fokus på folkehelse.

Folka og næringslivet i kommunen er avhengig av at kommunen heng saman med resten av verda på ein god og effektiv måte. Mobildekning og fiber er difor viktig på linje med tenlege vegar. Det er viktig for Stad Senterparti at heile kommunen har god kommunikasjon og infrastruktur lokalt, nasjonalt og globalt.

Senterpartiet vil difor:

- Drive fram utbygging av både fiber og mobildekning til alle bygder i heile Stad.
- Sørge for godt vedlikehald av det kommunale vegnettet.
- Vere ein kontinuerleg pådrivar for realisering av brua Anda-Lote.
- Arbeide for Stad Skipstunnel og for å sikre kommunen og innbyggjarane sine interesser i den samanheng.
- Arbeide for gode og tenlege bussruter, særleg for at barn og unge skal kunne nytte seg av fritidstilbod i kommunen, gjerne gjennom bestillingsrute.
- Arbeide for opprusting av vegen Kjøde – Sandvik.
- Arbeide for utbedring av vegen Fossebakken – Navelsaker.
- Arbeide for trygging av rasutsette strekningar i kommunen som Skredestranda, riksveg 618 Sørpollen og Navelsaker.
- Arbeide for å gjennomføre vedtekne trafikktryggingsplanar.
- Arbeide for å byggje gangveg langs RV 15 forbi Stårheim.
- Arbeide for å ha samanhengande gang- og sykkelveg frå Haugen til Nordfjordeid (Skårhaug til Svora).
- Arbeide for gang- og sykkelveg Naveosen – Bryggja skule.
- Arbeide for hurtigbåtforbindele Bergen – Ålesund/Vigra.
- Halde på dagens nivå på ferje- og båttilbod.
- Arbeide for at det blir utgreia om bygging av tunnel frå Moldefjorden til Kjøde, og vidare frå Kjøde til Maurstad kan bidra til å effektivisere utbygging av Stadt Skipstunnel, og auke den totale samfunnsnyttan.

Gode arbeidsplassar

Vi vil vidareutvikle det sterke og varierte næringslivet vi har i Stad kommune. Vi har store utviklingsmoglegheiter innanfor fleire sektorar. Vi ynskjer utnytte våre fortrinn i tradisjonelle næringar. Vi må også utnytte større del av potensialet innanfor produksjon og foredling av mat, energi, produkt og materiale basert på fornybare biologiske ressursar som skog, jord, husdyr og plantar. Vekst er ikkje alltid å bruke meir, men å forvalte betre. Det er vekstpotensiale og forretningsmoglegheiter i å finne berekraftige løysingar for framtida.

Den nye kommunen skal drive eit offensivt næringsutviklingsarbeid i samspel med bedriftene. Rekruttering er ein av dei største flaskehalsane for at bedriftene i vår kommune skal kunne utnytte potensialet sitt for vekst og utvikling. Her har kommunen og næringslivet ei felles interesse. Samarbeid mellom næringsliv og skule, og utvikling av desentraliserte utdanningstilbod er difor viktig.

Stad skal vere ein tydeleg og sterk kystkommune som samarbeider med sine nabokommunar på kysten. Og Stad skal samstundes vere ein kommune plassert sentralt i Nordfjord som byggjer sterke bu- og arbeidsområde gjennom samarbeid med kommunane i indre Nordfjord. Realisering av Nordfjordbrua Anda-Lote er eit viktig utløysande tiltak som må realiserast.

Landbruk – vi vil:

- ha eit variert landbruk, med rom for både store og små produksjonar.
- Ikkje bygge ned dyrka jord, og verne om dyrkbar jord for å ha mogelegheit til å auke matproduksjonen i framtida.
- arbeide for fortetting og høg utnyttingsgrad av andre aktuelle areal.
- Ha betre oppfølging av bu og driveplikt.
- utarbeide ein landbruksplan.
- Oppretthalde kulturlandskapet og kystlyngheia ved å auke tal beitedyr i utmarka.
- Ta vare på og vidareutvikle den unike kystgeita.
- Arbeide for eit aktivt og støttande landbrukskontor.

Reiseliv – vi vil:

- Vidareutvikle natur- og kulturbasert reiseliv.
- Arbeide for at Stadt kommune tek posisjon som Vikinghovudstad i verda.
 - Sagastad
 - Dragseidet
 - Stadt Skipstunnel
- Utvikle Vestkapp, Selja, St. Sunniva og klosteret som reisemål.
- Legge til rette for pilgrimturisme og arbeide for å få regionalt pilegrimssenter til Selje.
- stille krav til at Cruise turismen ikkje ureinar lokalt.
- Arbeide for at postvegen Bryggja – Selje får status som nasjonal turiststi.
- Satse på fjordhesten og vidareutvikling av Norsk Fjordhestesenteret. Vidareføre ridesti frå Fossane til Harpefossen.
- legge til rette for aktivitetsbasert turisme slik som til dømes sykkel, ski, fjellopplevingar, klatring, surfing, fising, dykking med meir. For å få dette til treng vi aktive og levande lokalsamfunn.
- Oppretthalde kulturlandskapet.

- Legge til rette for satsing på gjestehammer og infrastruktur nord og sør for Stadt skipstunnel slik at båtturistane stoppar og utforskar Stad kommune.

Handelsnæring – vi vil:

- Vidareutvikle Nordfjordeid som eit handelssentrum.
- Ha mest mogleg fortetting av Nordfjordeid som handelssentrum.
- Sikre at handelsnæringa vert mest mogleg robust mot netthandel – vi ynskjer ein felles strategi som gjer at Nordfjordeid er plassen alle ynskjer å handle. Dette handlar om aktivitetar for både born og unge utanom shopping.

Fiskeri-havbruksnæring – vi vil

- legge til rette for å utnytte vekstpotensialet innanfor sjømatnæringa i heile kommunen inkludert leverandørindustri mot desse næringane.
- legge til rette med areal i kystsona, også med tanke på nye artar.
- Arbeide mot taretråling på stadar det gjev negative konsekvensar.
- innføre arealavgift på sjø som skal gå til vertskommunen. Senterpartiet avviser alle forslag om grunnrentebeskatning på oppdrett og fangst av fisk.
- vere ei god hamn for dei selskapa vi har innanfor fiskeflåten og foredling.
- stimulere til meir vidareforedling og verdiskaping av ressursane frå havet.
- arbeide for ein variert fiskeflåte.
- Dekke behovet for fiskerihamn i Selje i samarbeid med fiskarlaget og lokale fiskarar sør for Stadt. Arbeide for at Lestovika vert realisert som fiskerihamn, hurtigbåtkai og kai for persontransport.

Offentlege arbeidsplassar

- Stad kommune har per i dag kommunehus både i Selje og Nordfjordeid. Dei administrative oppgåvene skal bidra til at denne type arbeidsplassar er tilgjengeleg i Selje også i framtida. Dette bidrar også til at kapasiteten i rådhuset på Nordfjordeid ikkje blir sprengt.
- Arbeide for at Stad kommune kan vere vertskap for statlege arbeidsoppgåver, og samarbeide i Nordfjord for at oppgåver vert flytta ut til vår region.
- Arbeide aktivt for å styrke og bevare dei offentlege statlege arbeidsoppgåvene som er i kommunen og i Nordfjordregionen.

Generelt for næringslivet

- Senterpartiet vil arbeide for best mogleg rammevilkår for næringslivet.
- Arbeide for Stad kommune ikkje får høgare arbeidsgjevaravgift i samband med ny BA-regionar.
- skatt på næring er aktuelt *dersom* kommunen er heilt avhengig av dette for å kunne oppretthalde livskraftige lokalsamfunn som tener bedriftene behov.
- Vi vil arbeide for et strategisk samarbeid mellom kommune og næringsliv på identitetsbygging, relasjonsbygging og rekruttering.

Ein god plass å bli gamal

Samspel mellom generasjonar gjev ein viktig dimensjon over livet. Senterpartiet ynskjer eit lokalsamfunn som verdset dei eldre og slepper til dei eldre som viktige ressursar i samfunnet. Vi ynskjer at alle blir sett og at ingen er einsame dei siste åra av livet. Kontakt mellom barnehageborn og skuleborn og eldre er verdifullt for begge partar og gjev auka livsglede.

Utfordringane med økt levealder og fleire eldre er at dei pasientane som blir innlagt på sjukeheimane har meir samansette problem som vil krevje meir kompetanse hjå dei tilsette på sjukeheimane. I tillegg kan desse pasientane vere meir ressurskrevjande. Samhandlingsreforma føre til at pasientar blir utskrivne tidlegare til kommunane, mange av dei med samansette behov. Stad senterparti tar dette på største alvor og vi skal ta vare på våre eldre på ein verdig måte.

Vi vil:

- Legge til rette for eldre som ynskjer å bidra i sitt lokalsamfunn.
- Arbeide mot einsemd.
- Sikre dei eldre på institusjonane nylaga middag.
- Senterpartiet meiner at kommunen må legge til rette for dei eldre ved å styrkje heimetenestene og byggje bustadar i sentrum der bebuarane kan klare seg mest mogleg sjølve – til dømes lage koseleg parallellgate til Tverrgata på Nordfjordeid.
- Tilbod etter behov, eldretuna spelar ei viktig rolle for at eldre skal bu mest mogleg lokalt så lenge som mogleg.
- Satse på dagsentertilbod.
- Satse på førebygging og trening i å meistre eige liv. Institusjonsplassen skal stå klar den dagen behovet er der.
- Ta i bruk velferdsteknologi.
- Ha ein pårørandepolitikk der ein tilbyr omsorgsløn og gode avlastningsmoglegheiter for dei som tek seg av sine eldre.
- Ha nok faglærde helsepersonell for å ivareta pasientane sitt helsebehov.
- At pasientane skal ha tilbod om ein aktiv og innhaldsrik kvardag.
- At pasientane og pårørande skal ha innflytelse og få ein individualisert plan på sin kvardag.
- Legge til rette for godt samarbeid mellom alle institusjonar, samt sjå heilskapleg på helse og omsorg.

Klima og samfunnsansvar

Senterpartiet er eit grasrotparti med nærleik til naturen. Menneska lever på naturen sine premiss. Våre viktige prinsipp er «vern gjennom bruk» og «tenk globalt, handle lokalt». Vi må ta tunge grep og byggje brua frå det fossile til det fornybare samfunnet. Vi kan bidra lokalt. Kommunar og fylkeskommunar kan bidra med sine krav til kjøp av varer og tenester. Det kan bidra til å gjere teknologi frå Noreg verdsléiande på leveransar til fornybar energi og industri. Men staten må medverke med å stimulere til denne satsinga. På same måte som Noreg investerte milliardar for å utvikle oljeteknologien på 70-talet. Vi må ta dei rette grep for at våre born sine born skal ha ein god morgondag.

Vi vil:

- Sikre gode kommunale løysingar som minimerer behovet for transport.
- Sikre nærleik til tenester ein har behov for i kvardagen.
- Føre ein offentleg innkjøpspolitikk som stimulerer til lågutslepp og om mogleg nullutslepp.
- Stimulere til å drive skogen aktivt.
- Dyrke havets skog gjennom tilrettelegging for taredyrking.
- Vere positiv til havvindmøller, bølgekraft, og vasskraft. Senterpartiet er skeptiske til vindmøller på land.
- Ta vare på matjorda.
- Utreie moglegheitene for utsleppsfri skyssordning i Prestemarka, Myklebuståsen og Hågaåsen.
- Sikre matberedskap lokalt og produsere all mat vi kan i Noreg frå både land og hav.
- Arbeide for å etablere et nasjonalt CO2-fond for næringstransport i samarbeid med næringslivet.
- Arbeide for overføring av transport frå veg til kjøll.
- Arbeide for at staten følgjer opp med midlar som gjer det mogleg å føre ein offentleg innkjøpspolitikk som aukar etterspurnaden etter klimasmarte løysingar og bruk av fornybare råstoff med eit langsiktig mål om at dette skal bli økonomisk berekraftig.



10 gode grunnar til å stemme Senterpartiet i Stad kommune

1. Behalde eksisterande skulestruktur.
2. Jobbe for byggjeklare tomter i alle krinsar.
3. Handelsstaden Nordfjordeid som vekstsenter i Nordfjord.
4. Mobildekning og fiber til alle bygder i Stad kommune.
5. Jobbe for å opne tannklinikken i Selje for skuleborn.
6. Jobbe for å realisere fleirbrukshall/kulturhus i Selje.
7. Arbeide for trygge og gode møteplassar for ungdom.
8. Reduksjon av leigesatsar på idrett og kulturskule.
9. Arbeide for å etablere Stad som vikinghovudstad i verda.
10. Tenleg vegnett for folk og næringsliv.